



The Governor

ITANGAZO RIGENEWE ITANGANZAMAKURU

Banki Nkuru y'u Rwanda yagumishije igipimo cy'inyungu fatizo yayo kuri 4.5%:

Mu nama yayo ngarukagihembwe yateranye ku wa 11 Ugushyingo 2020, Komite ishinzwe Politiki y'ifaranga muri Banki Nkuru y'u Rwanda yasuzumye ibyagezweho nyuma y'ingamba zafashwe mu nama ishize, inasesengura uko ubukungu bwifashe n'uko bwitezwe mu gihe kiri imbere, ku rwego rw'Isi n'imbere mu Gihugu. Inama yasanze umusaruro mbumbe w'imbere mu Gihugu uzatangira kuzanzamuka mu gihembwe cya gatatu bitewe n'ingamba zo gukumira ikwirakwira ry'icyorezo cya COVID-19 zorohejwe.

Iteganyamibare ryerekenana ko igipimo cy'ihindagurika ry'ibiciro ku isoko kizagenda kigabanuka uherye mu gihembwe cya kane cy'uyu mwaka wa 2020, bitewe n'uko igipimo cy'ibisabwa ku isoko kikiri hasi ku rwego rw'Isi n'imbere mu Gihugu, hamwe n'ibiciro byo gutwarira abagenzi hamwe byagabanyijwe uherye mu kwezi k'Ukwakira 2020. Ishingiye kuri ibi byose, Komite yakomeje politiki yayo y'ifaranga yo korohereza ishoramari binyuze mu rwego rw'amabanki, ifata icyemezo cyo kugumisha igipimo cy'inyungu fatizo ya Banki Nkuru kuri 4.5%.

Ubukungu bw'isi bwitezwe kuzahazwa cyane n'icyorezo cya COVID-19:

Raporo y'Ikigega Mpuzamahanga cy'Imari yo mu Ukwakira 2020, yerekana ko ubukungu bw'isi buzahungabana ku kigero cya 4.4%, hasi gato y'igipimo cy'ihungabana cya 4.9% cyateganywaga muri Raporo yo muri Kamena 2020. Ibi bikaba byaraturutse ahanini ku izanzamuka ry'ibikorwa by'ubukungu muri Gicurasi na Kamena, ariko kuba ubwandu bwa COVID-19 bwongeye kwiyongera hirya no hino ku Isi, bishobora gutuma ibihugu byinshi bisubira muri gahunda ya guma mu rugo. Mu mwaka wa 2021, ubukungu bw'isi bwitezwe kuziba icyuho bukazamukaho 5.2% n'ubwo hakiri ingorane zijyanye n'ingamba zo gukumira ikwirakwira rya COVID-19, hamwe n'izamuka rikabije ry'imyenda ya Leta mu bihugu byinshi.

Ubukungu bw'u Rwanda bwitezwe kuziba icyuho cyatewe n'icyorezo cya COVID-19:

Mu gihembwe cya kabiri cy'uyu mwaka wa 2020, umusaruro mbumbe w'imbere mu Gihugu wahungabanye ku kigero cya 12.4% bitewe n'ifungwa ry'ibikorwa by'ubukungu mu rwego rwo gukumira ikwirakwira ry'ubwandu bwa Koronavirusi. Ariko, ibipimo byihuse bigenderwaho mu gusesengura uko ubukungu buhagaze, byerekana ko buzanzamuka mu gihembwe cya gatatu cy'uyu mwaka. By'umwihariko, igipimo Banki Nkuru yifashisha mu gusuzuma



icyerekezo cy'ubukungu mu gihe gito kiri imbere, cyazamutseho 6.3% mu gihembwe cya gatatu cy'uyu mwaka wa 2020, mu gihe cyari cyagabanutseho 9.1% mu gihembwe cya kabiri.

Byongeye kandi, umusaruro w'ibyacuujwe n'urwego rw'inganda n'urwa serivisi wariyongereye n'ubwo ukiri hasi ugereranyije n'uwabonetse mu gihe nk'iki cy'umwaka ushize. Umusaruro wavuye ku byagurishijwe n'urwego rw'inganda, wariyongereye mu gihembwe cya gatatu cy'umwaka wa 2020, ahanini bitewe n'ingufu Leta yashyize mu bikorwa by'ubwubatsi bw'amashuri, imihanda n'ibigo nderabuzima, byasabaga ibikoresho by'ibanze byinshi bikorwa n'inganda.

N'ubwo ingorane zigendanye n'icyorezo cya COVID-19 zikomeje kubangamira umusaruro mu rwego rwa serivisi, umusaruro w'uru rwego wahungabanye buhoro mu gihembwe cya gatatu 2020 ugereranyije n'uko byagenze mu gihembwe cyabanje.

Uruhare rw'igipimo cy'inyungu fatizo ya BNR mu kugena inyungu z'isoko ry'imari rwariyongereye:

Politiki y'Ifaranga ya Banki Nkuru yo korohereza ishoramari, yatumye ibipimo by'inyungu ku isoko ry'imari zigabanuka. Mu bihembwe bitatu bya mbere by'uyu mwaka wa 2020, igipimo mpuzandengo cy'inyungu ku nguzanyo zitangwa na Banki z'ubucuruzi, cyagabanutseho ibice 18 kigera kuri 16.31% ugereranyije n'ibihembwe bitatu bya mbere by'umwaka wa 2019. Ibi byitezweho gushyigikira izahuka ry'ubukungu.

Ubushobozi bw'amabanki y'ubucuruzi bwo gutanga inguzanyo bwakomeje kuba hejuru:

Amabanki y'ubucuruzi yakomeje kugira ubushobozi buhagije bwo gutanga inguzanyo kuko butahungabanyijwe n'iki cyorezo cya COVID-19. Ubu bushobozi bwiyongereye bitewe n'ingamba zafashwe na Banki Nkuru na Leta y'u Rwanda, mu gihe ubusabe bw'inguzanyo ku bikorera bwari hasi bitewe n'ifungwa ry'ibikorwa by'ubukungu hirindwa ikwirakwira ry'ubwandu bwa COVID-19. Mu mpera za Nzeri 2020, igipimo cy'amafaranga akoreshwa mu Gihugu, cyiyongereyeho 23.1% ugereranyije na Nzeri 2019, n'aho inguzanyo ku bikorera zizamukaho 17.4%.

Nta hindagurika rikabije ku isoko ry'ivunjisha:

Mu mezi icumi ya mbere y'umwaka wa 2020, agaciro k'ifaranga ry'u Rwanda kagabanutseho 4.4% ugereranyije n'idolari ry'Amerika, mu gihe kari kagabanutseho 4.0% mu gihe nk'iki umwaka wa 2019. Mu mpera z'ukwezi k'Ukwakira 2020, Igihugu cyari gifite ubwizigame mu madovize buhagije, bwafasha mu gutumiza ibintu mu mahanga mu gihe cy'amezi 5.8 nta yandi madovize yinjiye. Mu gihe cyavuba, nta hindagurika rikabije ryitezwe ku isoko ry'ivunjisha.

Igipimo rusange cy'ihindagurika ry'ibiciro ku isoko kitezwe kugabanuka uhereye mu gihembwe cya kane 2020:

Mu gihembwe cya gatatu cy'uyu mwaka wa 2020, igipimo cy'ihindagurika ry'ibiciro ku isoko hatarimo ibiribwa byangirika vuba n'iby'ibikomoka ku ngufu, ndetse n'ibiciro by'ibikomoka ku ngufu ubwabyo byagiye bigabanuka. Nyamara, igipimo rusange cy'indindagurika ry'ibiciro ku isoko cyarenze imbago Banki Nkuru yihaye, kigera kuri 9.0%, ahanini bitewe n'ibiciro byo gutwarira abagenzi mu buryo bwa rusange cyakomeje kuba hejuru.

Ariko, uku kugabanuka kw'ibi biciro byavuzwe hejuru, kuzagaragarira mu gipimo rusange cy'ihindagurika ry'ibiciro ku isoko mu gihembwe cya kane, giteganyijwe kuba hafi ya 6%. Iteganyamibare ryerekanako igipimo cy'ihindagurika ry'ibiciro bitarimo iby'ibiribwa byangirika vuba n'iby'ibikomoka ku ngufu kizarushaho kugabanuka bitewe n'uko igipimo cy'ibisabwa ku isoko kikiri hasi ari imbere mu Gihugu ari no ku rwego rw'Isi, hamwe n'ibiciro byo gutwarira abagenzi hamwe byasubijwe ku kigero byariho mbere y'iki cyorezo. Ku bw'ibyo, mu mwaka wa 2021, igipimo rusange cy'ihindagurika ry'ibiciro ku isoko giteganyijwe kuzamuka ku kigero cyo hasi, munsu y'igipimo fatizo cya BNR cya 5%.

Komite ishinze Politiki y'Ifaranga izakomeza gukurikiranira hafi uko ubukungu bw'Igihugu n'ubw'Isi bwifashe kandi yiteguye gufata ingamba zikwiye, igihe cyose bibaye ngombwa.

Ku wa 12 Ugushyingo, 2020


RWANGOMBWA John
Guverineri akaba
n'Umuyobozi wa Komite ya Politiki y'Ifaranga

